

Dimanche fuiuant on en fait autant du Nouveau, le tout pour se conformer à ce qui est escrit, *Hæc est vita æterna, vt cognoscant te Deum, & quem misisti Iesum Christum.*

On prend vn iour ouurier de la femaine, pour faire vn autre instruction publique [19] à tous indifferemment, soit fidelles, soit infidelles: ce qui se passe en ceste maniere. Sur l'heure du Midy on s'en va crier par le bourg, ou avec la clochette inuiter, dans les ruës & carrefours, au conseil, mais au conseil des conseils, qui concerne l'affaire importante du salut. Au lieu où il n'a point de Chappelle, & ou nostre cabane est trop petite, on le fa[i]ct le plus que l'on peut au dehors, & lors que le temps & la saison ne le permettent, on le faict au dedans; mais pour lors on n'admet que les hommes referuant les femmes & les enfans au lendemain. Le monde estant assemblé, apres l'inuocation du sainct Esprit, on dit ou l'on chante vne Oraison propre à cét exercice en langue Huronne. Apres quoy on commence l'instruction, qui est quelquefois interrompuë par l'approbation ou obiections des Sauvages: à la fin de laquelle on leur fait faire quelques prieres, & entr'autres vne petite, ou est enfermé l'acte de contrition. A l'issuë de cela, on se met à chanter le *Credo*, les Commandemens, le *Pater*, l'*Aue*, & autres prieres, tant & si peu qu'on voit les Sauvages attentifs, & en estat d'en faire leur profit.

[20] Outre ceste instruction commune, on en fait quelqu'autre iour de la femaine vne moins generale, où sont inuitées nommement les personnes qu'on desire y assister, qui sont les Capitaines & les plus notables du Bourg qui ont esté recogneus auoir quel-